



UNIVERSITÄTS-
BIBLIOTHEK
PADERBORN

Universitätsbibliothek Paderborn

Petri Castellani Magni Franciæ Eleemosynarii Vita

Galland, Pierre

Parisiis, 1674

Stephani Baluzii Tvstelensis Præfatio Ad Lectorem.

urn:nbn:de:hbz:466:1-14617



STEPHANI BALVZII TVTELENSIS

PRÆFATIO AD LECTOREM.

PETRI CASTELLANI vita, quam tibi damus, Lector, ita eleganter atque ornatè scripta est ut ei obtigisse omnino videatur illa felicitas quam Achilli, qui rerum à se bene gestarum præconem nactus erat Homerum, invidisse Alexandrum Magnum tradit Flavius Vopiscus in Probo. Verùm ut planè persuasum habeo plurimam ex istius libri lectione voluptatem simul & utilitatem capturos eos qui ad illum legendum accedent, ita valde vereor ne nonnullis displiceat immoderata Castellani in dicendo libertas, iis præsertim locis in quibus sermo incidit de Romanis Pontificibus. Optandum fortassis esset ut ista omissa à Gallandio fuissent; neque animus est ea approbare. Illud tantùm ab æquis lec-

à y.

P R Æ F A T I O

toribus postulo, ne ex paucis paulò asperioribus verbis quæ viro magno exciderunt, adversus eum præjudicent, néve hinc colligant eum malo animo aut pravo affectu in has sententias erupisse. Nam qui alicubi, ut erat natura vehemens, acerbè & contumeliosè invehitur in Pontifices Romanos illorum temporum, magnificè postea, & id quidem in aliquot locis, ne casus videri possit, de summa eorum & sedis apostolicæ dignitate & auctoritate sentit, cum qua necessariò retinendam esse communionem verbis minimè ambiguis proficitur. Neque sanè mirum videri cuiquam debet eum vehementiùs commoveri solitum adversus Pontifices Romanos, cum nec ab Augustino quidem Hipponensi Episcopo se abstinerit; quem ita inimicè insectatur ut præterquam quòd eum bonarum artium magis non ignorantem quàm peritum dici posse prædicat, adeoque ejus lucubrationes citra fastidium legi vix posse ab homine liberaliter in literis educato, præterea linguarum ignoratione somniasse frequenter atque etiam delirasse sacra explicando asseverarit; ut Gallandius ait in capite xxvii. istius libri.

Nihil heic ex meo addidi. Tantùm notas temporum adjunxi quibus quæque res contingere; in quibus designandis Gallan-

AD LECTOREM.

dius fuit admodum parvus. Addidi deinde narrationem pompæ funebris Francisci primi Regis Christianissimi, cujus auctorem esse Castellanium reperi in veteribus memoriis illorum temporum, & duas orationes ab eo habitas in laudem maximi Principis, literarum & artium parentis.

Superest ut tecum paucis agam de libro ipso, hoc est, quomodo in manus meas pervenerit. Vir clarissimus & doctissimus (quod me citra adulationem verè dicere omnes docti facilè intelligunt) Carolus du Fresne Dominus du Cange & Franciæ apud Ambianos Quæstor eum apud se diù habuit, illum ipsum, ut opinari licet, qui Margaretæ Francisci Regis filiæ oblatus fuit. Poterat ille, qui tot bonos auctores vel primus edidit vel meliores dedit, suam operam heic collocare utiliter in publicum. Sed sive difficultate temporis victus, occupatissimus alioqui in paranda nova editione annalium Zonaræ & Glossarii Latino-Barbari, immensi operis ac laboris, seu quia mihi pro amicitia nostra gratificari voluit, librum hunc mihi dedit, potestatemque fecit edendi. Ego verò nolui committere ut diutiùs lateret, præsertim cum agnoscerem permulta illic extare scitu dignissima quorum nulla alibi mentio. Ea fuit occasio istius editionis.

P R Æ F A T I O A D L E C T.

De Gallandio quoque heic nonnulla dicenda sunt; ne qui librum hunc scribendo effecit ne Castellanus periret, neglectus à nobis esse videatur. Fuit igitur Gallandius natione Belga, ex oppido Aëria in pago Atrebatensi, ut scribit Aubertus Miræus. Becodiani apud Lutetiam collegij moderator & instaurator fuit, regiúsque literarum Latinarum Professor, & cathedralis Ecclesiæ Parisiensis Canonicus. Mortuus est anno MDLIX. dysenteria morbo oppressus, ut colligi potest ex epitaphio quod ei posuit Ioachimus Bellaius. Extant varia ejus lucubrationes editæ, quarum catalogum habet Valerius Andreas in Bibliotheca Belgica. Inter eas eminere videtur collectio auctorum qui de limitibus agrorum scripsere, quam ille unà cum Adriano Turnebo accuravit, solus dedicavit. Quò magis mirum est virum clarissimum Nicolaum Rigaltium, cum hos libros rursus ederet, totam istius editionis gloriam refudisse in Turnebum, Gallandio ne nominato quidem. Addere porrò volui hoc loco fragmentum ex oratione à Gallandio habita in funere Francisci primi, ne quid heic desit eorum quæ ille scripsit de Petro Castellano.